

烈  
皇  
小  
識

此書原本四卷割配連史刻本析為八  
 卷且多改易去字丁丑歲南得此書  
 四卷本於成都觀其行款知出  
 建氏中本及檢晚明一  
 烈皇小識  
 一  
 和出陽謝氏

真本也  
 亥年五月

烈皇小識序

烈皇昔由藩邸入繼 大統毒霧迷空荆棘滿地

刀鋒劍鋸之中不動聲色巨奸立掃真所謂聰明睿智神武不  
殺者耶儀監於殺盡徹諸內奄政事俱歸于外廷誠十載一時  
也然而逆璫遺孽但知力護殘局不復顧 國家大計即廢藉  
諸公亦閤歷久而情面深無復有贊皇親公其人者且也長山  
以改 教獲戾而 上疑大臣不足倚矣未幾烏程以校卜告  
訐而 上疑群臣不足信矣次年罪督以私款債事而 上疑  
邊臣不足任矣舉外廷皆不可恃勢不得不仍歸于內廷又有  
借不測之恩威伸其瞻之喜怒者事權乃盡歸于內而不可復

收嗟乎赫：師尹顛倒豪傑者乃爾即後先臣以講筵荷蒙  
聖鑒超拔政府真有虛已以聽之意而兩月揆地一語招尤致負  
聖明特達無以報稱天乎人乎豈氣運使然乎先臣罷而韓城武  
陵革進雖聖主日見其憂勤而群工日流于黨比痼疾已成  
不復可藥矣不肖於十七年中脩集烈皇行事以志克瘳吾  
君之思又以志有君無臣之歎集成巨帙數十冊可脩一朝  
史料因遭家難同先世藏書翰墨等項誤行寄托遂不可問致  
烈皇遺蹟微行湮沒不彰當亦有志所共痛心疾首者也年來屏

跡深山間有客相遇以詢及舊事尚有一二彷彿胸臆間竊恐  
失此不傳後悔莫及又承同志或以一人一事相示因纂抄成  
冊名曰 烈皇小識意四方君子當有識其大者雖所纂者十  
不得二三然以脩修史者之採擇亦未必無小助迨至天不祚  
明 帝星告隕守正不屈寧以身殉報悲憤填膺托吭欲絕涕  
泗滂沱幾執筆而不能下矣

竺塢遺民文秉書于考槃之煮石亭

國祚移于逆閹之手故流賊始末不敢不詳採之明史紀事者  
十之六東叩隨筆者十之二得之傳聞者亦十之二即附集  
於本年之後就中不無異同差訛是望 高明教正

甲申季春望後四日錄于懷新堂之右軒

烈皇小識卷一

烈皇帝為 光廟第五子 孝純劉太后所出而

楊嗣昌子嗣昌莊

妃天啟二年九月 冊封信王七年二月出就外邸成婚 冊

妃周氏 熹廟病危魏忠賢遣腹奄涂文輔王朝輔迎 上入

宮 上時自危甚袖食物以入不敢食宮中物是夜秉燭獨坐

見一奄携飯過取之置置几上許給以賞憫巡邏者欲犒以酒

食問左右何以取給左右對宜取之光祿因傳 令旨適犒之

歡聲如雷 周后在外却禱卜無虛畧亦虞入朝有他變也

上既即位 廷議改元禮部擬進者四永昌紹慶咸寧崇貞

御筆改貞為禎點用之

上即位後追尊 劉后孝純皇太后遷祔 慶陵加 李莊妃謚  
鄴立 周妃為皇后尊 張后為懿安皇后 孝純母年七十  
五封瀛國太夫人姪劉文炳封新樂侯 周后父周奎授左都  
督次年 冊立 太子封奎嘉定伯 懿安父張國紀封太康  
伯凡 四大朝 廷臣俱用朝冠朝服內奄則否惟歲除祭中霤  
之神司禮監掌印太監代行祭禮奏請祭服：之 大朝止磕頭  
呼萬歲而已逆賢擅政凡遇 大朝自王体乾至譚子等俱僭用  
朝冠朝服于乾清宮大殿內炷外廷儀制行慶賀山呼禮贊禮



內奄一如鴻臚班首亦致辭焉後魏良卿晉封逆賢改戴貂蟬  
冠班列王体乾上及上登極逆賢仍炤嘉廟行禮懋憚

上英明止用本等服色同衆叩頭呼萬歲

逆賢用事動以立枷示威前後斃者以千計上一日問及逆  
賢時與王体乾侍側体乾對曰大奸大惡法所不能治者用之  
上感然曰雖如此說殊覺太慘非國家盛事也逆賢默然衆共叩  
頭呼萬歲而退

上既登極所以優禮客親者一如嘉廟而信邸承奉盡易以新  
銜入內供事後將李朝欽裴有聲王東恭吳光成譚敬裴芳等

次第准其乞休逆賢羽翼翦除一空復散遣內丁方始摘遂逆賢肘腋巨奸不動聲色潛移默奪非天縱英武何以有此時閭臣四員黃立極施鳳來張瑞岳李國樞皆逆賢爰立也

上首放立極而亟允枚卜之請特點華亭錢龍錫吳江周道登蕭山米宗道高邑李標長山劉鴻訓晉江楊景辰六員後宗道以禮部題崔呈秀父卹典有在天之靈等語景辰以掌院率諸翰林公疏頌美逆賢俱為科道糾劾次年與三舊輔俱次第斥放回籍

上諭兵部各處鎮守內官一概撤回凡相機度宜約束吏士無事

修脩有事却教俱聽督撫便宜調度無復委任不事體統相軋  
以藉其口各鎮督撫諸臣及大小將領務提起精神殫靖忠盡  
以副朕懷

上諭戶部封疆多事徵輸甚煩朕珠惻焉撫松等處織造朕不忍  
以衣被組綉之工重困此一方民其俟東南底定之日方行開  
造以稱朕敬天恤民至意

上諭吏部魏忠賢崔呈秀天刑已殛臣民之情稍紓而詔獄進魂  
猶然鬱銅含冤未伸着該部院并九卿科道將已前斥害諸臣  
從公酌議採擇官評有非法禁斃情最可憫者應褒贈即與褒  
贈應卹蔭即與卹蔭其削奪牽連者應優官即與復官應起用

即興起用有身故捏誣難結家屬波累羈囚者應開釋即興開釋勿致久淹傷朕好生之心

上諭禮部朕覽會典自宮禁例一款民間有四五子以上許以一子報官閹割有司造冊送部院收補日選用敢有私自淨身者本身及下手之人處斬全家發烟瘴地面充軍兩隣歇家不舉者治罪我祖宗好生德意真至周密故立法嚴明近來無知小民希圖財利私行閹割童稚不堪多至殞命違禁戕生深可痛恨自今以往且不收選爾部可宣布朕意多列榜文諭到之

日為始敢有犯者按法正罪仍許諸色人等當時首告本地官司奏聞隣右歇家不舉從重治罪省司知而不禁併行究處倘有強鬧他人希圖誣賴的訊明反坐決不徇縱布告中外恪行遵守

御史楊維垣疏奏崔呈秀後擬與群奸共收餘燼力持殘局時已差河東巡鹽河南掌道御史安伸題請留佐大計則藉諸臣雖屢奉起用之旨維垣一手握定百方阻遏新叅蕭山晉江係彼同志協力護持監生胡煥猷疏論黃立桂等四人謂當逆賢擅權揣摩意旨專事逢迎漸直建碑立祠各撰文稱頌且並行罷斥并乞查究督撫按之建祠者又言起廢不公不廣維垣特出

疏叅駁且請下法司究問主使蕭山已累嚴旨 御筆批胡煥  
猷雖必有賄使之者但不必苛求以滋葛藤璫黨咸俯首喪氣  
中外頌 大聖人舉動出尋常矣

時言路皆遂賢餘孽 上特下考選之令先後授曹師稷顧繼  
祖宋鳴梧瞿式耜鍾炆等為給事中吳煥葉成章任贊化等為  
御史咸以糾彈璫黨為事而 朝端漸見清明矣

崔呈秀子崔鐸北榜中式周應秋子周錄南榜中式雖經被革  
而衡文者尚迭指摘南京國子監助教施元徵上疏劾之于是

中書林華芳江陰知縣岑之豹俱下部議罷斥主考徐時泰陳  
其慶等各疏辨以糊名為辭蕭山輩力庇之有 旨免議

崇禎元年戊辰正月大計天下吏

主計者吏部尚書房壯麗左都御史曹思誠考功郎中李宜培  
吏科都給事中魏炤素掌河南道印御史安伸佐計者楊維垣  
也是舉也為 聖天子第一新政宜將媚璫諸奸痛加掃除傾  
壯麗等皆璫孽也互為容隱咸逃吏議人心頗為不平云  
江西巡撫楊邦憲由陝西布政陞任當今 上正位之後猶追  
厥臣功德魏之疏拆毀名賢子羽祠并毀祠旁民居十餘家  
為造逆祠地河南右叅政周鏞造逆祠于開封建標祠所借書

大工且致書魏良卿欲為逆賢造湊金像四川右叅政郭士望  
補官一疏痛誠應山其說頗逆賢也令人髮指江西副使李光  
春已例轉矣猶䟽論福清脩極醜詆及申詳逆祠司道張福臻  
王化行等緊置格外即云撫按不行開送科道拾遺䟽獨不可  
糾舉耶仲興維垣不足道炤來亦漫無短長耶按炤來于甲子  
冬陞吏垣長見璫焰方張遂力請告歸里似乎有品骨者今臨  
事如此前後若兩截矣然炤來雖非璫孽而長垣一牀淵淥有  
自後入政府構成黃解之獄其生平已見于此



翰林院編修倪元璐奏世界已清方隅未化疏畧曰近攻崔魏者必引東林為對案一則曰邪黨再則曰邪黨何說乎以東林諸臣為邪臣黨人將以何名加之崔魏之輩崔魏而既邪黨矣向之首効忠賢忝提呈秀者又邪黨乎哉且天下之議論寧涉假借而必不可不歸于名義士人之行已寧存矯激而必不可不準諸廉隅自後之君子以假借矯激深咎前人于是乎彪虎之徒公然起而背畔名義踐裂廉隅矣于是乎連篇頌德匝地生祠矣夫頌德不已必將勸進生祠不已必且呼嵩而人猶且寬之曰無可奈何不得不然耳嗟乎充一無可奈何不得不然

之心又將何所不至哉然今日之持議者能以忠厚之心曲原此輩而獨持已甚之論苛責吾徒亦所謂悖也臣又伏請

聖旨有韓燬清忠有執朕所鑒知之諭深仰天聰曠然知人則哲如此而近聞廷臣之議殊有異同可為大怪燬之相業光偉他不其論即如紅丸議起舉國沸然維時與事大臣皆奮縮閉默而燬獨侃：條揭明其不然夫孫慎行君子也燬且不附況他人乎而今推較不及點灼橫加則徒以其衆挺然廷弼一事耳夫廷弼固自當誅在燬不為無說封疆大事繫：有徒而當日之議乃欲獨殺一廷弼豈平論哉此燬之所以閣筆也然究

竟廷弼不死于封疆而死于局面不死于法度而死于奸璫則  
又不可謂後之人能殺廷弼而殲獨不能殺之也又如詞臣文  
震孟正學劾骨有古大臣之器其鄉人之月旦比于陳寔王烈  
三月居官昌言獲罪人又以方之羅倫舒芬而今起用之旨再  
下謬悠之談不已甚有加以窩盜之名者豈以數十年前有其  
兄某不逞之事乎夫人知有某之不逞以為之兄而不知有某  
之至德某之特行以為之祖父且賢愚相越舜象已然世不閒  
柳下惠膺盜跖之誅司馬牛受向魋之罰文震孟何罪遭此嫌  
譏將無門戶二字不可重提耶用吏端以相遮抑耶 時衆論

咸推蒲州舊輔及先文肅錢公諱益姚公希孟等戶部員外王  
守履疏薦蒲州奉有韓煥清忠有執朕所鑒知之 旨而楊  
維垣一手障天子蒲州先文肅尤力行貶取輿情不平甚故倪  
公出此疏維垣隨出詞臣持論甚謬生心害政可虞疏駁之倪  
公亦出微臣平心入告臺臣我見未除疏畧曰臣請楊維垣入  
告諸疏深訝其不能仰副 聖心且若力欲與 皇上相反者  
蓋 皇上之諭一則曰分門別戶已非治徵一則曰化異為同  
一則曰天下為公而維垣之言則曰孫黨趙黨熊黨鄒黨  
皇上于韓煥文震孟曰清忠有執曰已著起用而維垣于二臣曰

非賢曰不檢是 皇上于方隅無所不化而維垣于方隅實有未化 皇上于正氣無所不伸而維垣于正氣實有未伸

皇上事：虛公而維垣言：我見臣竊惑焉據維垣折臣戚稱東林之尊李三才而護熊廷弼也然亦知東林中有首叅魏忠賢二十四罪之楊漣及提問崔呈秀欲追贓擬成之高攀龍乎且當日之議其于三才也特推其揮霍之畧未嘗不指之為貪其于廷弼也特未即西市之誅未嘗不坐之以辟則猶未為失論失刑也若以今日之事例之以魏忠賢之窮凶極惡積贓無算而維垣猶尊稱之曰嚴臣公嚴臣不愛錢嚴臣為國為民而何

况李三才以五虎五彪之交結近侍律當處斬法司奉有

嚴諭初擬止于削奪豈不如驕兒護之維垣身係言官不聞駁正  
又何尤昔人之護熊廷弼者乎而以臣為謬臣不受也維垣又  
折臣盛稱韓爌夫舍爌抵觸逆璫及抗疏櫻禍之蹟而加以說  
情用利莫須有之言已非定論矣即如廷弼一事爌但票免一  
象未嘗赦而欲用之也至廷弼行賄之說自是逆璫借此為楊  
左諸人追贓地耳逆璫初擬用移宮一案殺楊左諸人及獄上  
而以為難于坐贓于是再傳覆訊改為封疆之果汰贓毒比此  
天下共知者維垣奈何尚守是說乎至不附紅丸與孫慎行器

子之說臣言原非矛盾蓋慎行清望與王之案不同議雖深刻亦不失春秋書趙盾之法使後之人加慎焉可耳夫董狐不為責直趙盾未嘗貶賢而以臣為謬臣不受也維垣又折臣盛稱文震孟夫震孟臣不更論即如王紀清正素著以叅沈淮忤逆璫而譴斥文則以救王紀而降削均之得罪于逆璫者也至以破帽策蹇傲蟒玉馳驛此說何可全非夫刑賞出于朝廷而榮辱因之若王紀之時已半是魏忠賢之刑賞矣維垣試觀年來破帽策蹇之輩較之超階躐級之儔誰為榮辱自此義不明于是畏破帽策蹇者相率而頌德建祠布蟒玉馳驛者遂至呼父呼九十歲而不顧可勝歎哉至批昭告公祖之謗吳人盡能辨

之當朱童蒙官吳時偶一犯杖斃其妻貧不能殮乞丐里中文  
震孟從衆題助二金事止此耳有何把持放肆而以臣為謬臣  
不受也維垣又極力洗發臣矯激假借四字夫臣之為此言正  
為人之詆真狂狷為假名義者發也當崔魏之世人皆任真率  
性相與頌德建祠使有一人矯激假借而不頌不祠豈不捕賴  
此人哉認臣抑揚之詞為一成之論而以臣為謬臣不受也乃  
若維垣之持論臣心未安者三維垣以為真小人待其貫滿可  
攻而去之而臣以為非訓也即如崔魏之貫滿久矣使不過



聖明御宇誰有能攻而去之者維垣到底以無可奈何之說為頌  
德建祠者解嘲假令崔呈秀舞蹈稱臣于逆璫其餘諸臣使亦  
以為無可奈何而盡舞蹈稱臣乎又令逆璫以兵劫諸臣使從叛  
逆諸臣亦以為無可奈何使首從叛乎維垣又言今日之曲直  
不當以崔魏為對案而臣以為正當以崔魏為對案也夫人意  
見不同議論偶異摠不足以定貞邪如宋臣蘇軾程顥交詆為  
邪而兩人並自千古我朝大禮之爭論者亦兩賢之而惟主  
品節大閑一失遂成霄壤夫品節試之于崔魏而定矣故有東  
林之人為崔魏所恨其抵觸畏其才望而必欲殺之逐之者此

正人也有攻東林之人雖為崔魏所借而勁節不阿或遠或逐者亦正人也以崔魏定邪正辟之以鏡別妍媸維垣不取業于此而安取業乎總之東林取憎遂墻獨深受禍獨酷在今日當曲原其高明之槩不當毛舉其纖寸之瑕而揭：烏及代遂瑞公謗斯亦不善立論者矣疏入 上為心動維垣輩之毒網始破人謂倪公二疏寔為廓清首功云

光祿卿阮大鍼上合美七年通內神奸疏畧曰汪文言以徽州庫吏逃罪授王安幕下引左光斗入幕移宮之疏紛：迎合此內外謀傾宮闈之始御史賈繼春疏揭立爭汪文言等聯臺省

諛王安佐楊迪左光斗而結春削籍此中外謀殺言官之始史  
部尚書周嘉謨雅重熊廷弼復任經畧而重虐姚宗文馮三元  
此中外謀危封疆之始汪文言廢霍維華以謝王安逆賢效  
逐戚畹撼中宮此中外謀危 母后之始後御史毛羽健劾  
其比擬不倫黨邪害正有 旨阮大鍼前後反覆陰陽閃爍著  
魁帶閑住去蓋長山所票也

二月會試天下士 命施鳳來張瑞圖為考試官取中曹鼎等  
三百五十人

時群奸力持殘局海內正人槩不得登啟事翰林必由內閣題

請元城既逐平湖當國亦力持不可及是平湖晉江以會試主  
試考入闈高陽特題起陞先文肅姚文毅虞山朱繼祚四兼及  
者以避嫌也人謂老高陽聳愆成之

三月 廷試策士 賜劉若宰何瑞徵管紹寧等進士及第出  
身有差時

上留心策士進呈三十六卷並貯名金甌中以金著夾之凡三夾  
皆得若宰遂定為狀元前是枚卜筆亭少所推較者吏部垣記  
昭乘係筆亭丙辰所取士故得與會推 上亦貯名金甌用金  
著夾之首夾即得筆亭然丙公熟業德望俱無聞焉何以選

有天幸乃爾

御史吳煥疏奏漕運太監崔文昇畧曰文昇引進李可灼漫授  
寒瀉之藥以致光廟賓天實坐不救之辟而日為逆璫睚眦  
搃督漕運控扼江淮要害與劉志選虎踞南北遂為聲援貪汙  
慘刻人切齒文昇在淮尤為縱肆剝軍虐民幾激大變應行  
逮問疏入文昇拉同伴伏宮門哭聲達帝座上立擊倡首  
一奄同文昇各杖一百俱降淨軍發孝陵煥疏留中

倪元璐疏請毀三朝要典畧曰臣觀挺擊紅丸移宮三案議  
閼清流而三朝要典一書成于逆豎其議不可不兼行而其

書不可不速毀請詳其說蓋當事起議興盛廷立訟爭挺擊者  
力護東宮爭風癲者計安神祖主紅丸者仗義之言爭紅丸  
者衆心之論主移宮者弭變于幾先爭移宮者持平于事後六  
者各有其是不可偏非以為忠惻則皆忠惻以為明見則皆明  
見槩在逆璫未用之先群小未升之日雖甚水火不害壞荒此  
一局也既而楊漣二十四罪之疏發魏廣微此輩門戶之說興  
于是逆璫殺人則借三案群小求富貴則借三案經此二借  
三案之面目全非矣故凡推慈歸孝于先皇猶大稱頌德功  
于義父又一局也網已密而猶疑有遺鱗勢極重而或憂其翻

司于是崔魏諸奸乃始私立私編標題要典以之批根今日則衆正  
之黨碑以之免死他年則上公之鐵券又一局也由此而觀三  
案者天下之公議要典者魏氏之私書三案自三案要典自三  
典今孰爲金石不刊之論者誠未深思若夫翻即紛訾改亦多  
事如臣所見惟有毀之而已夫以奄豎之權而屈役史官之筆  
亘古未聞當毀一未易代而有編年不直書而加論斷若六仿  
佛明繪規模大典則是魏忠賢欲與 廟皇帝並聖崔呈秀  
可與張學敬比賢悖逆非倫當毀二矯誣 先帝偽撰宸篇  
既不可擬司馬光資治通鑑之書亦不得援宋神宗手製敕文

為例假竊誣妄常毀三又況史局將開館抄具條七載非難稽  
之世寔錄有本等之書何事留此駢枝供人唾罵當毀四當今  
正氣日升方隅漸化自宜進以平飲沃以溫湯然而逆瑞之遺  
蹟一日不滅則公正之憤十年不釋也時上即欲將要典焚  
毀蕭山果旨這所請關係重大着禮部會同史館諸臣詳議  
具奏御筆于具奏下增聽朕獨斷行五字既而廷議會同奉  
旨要典着即行焚毀侍講孫之獬詣東閣力爭不可毀繼以痛哭  
聲徹內外退復上力疾不能供職疏極言要典不可毀之故御  
史吳煥上疏糾之略曰孫之獬爭要典不可毀者云皇上行



熹宗魯北而事之見有御製序文在朕之一字豈可投之火是明  
以御製二字盛 皇上不敢動矣又云 皇上同枝繼立非有  
勝國之掃除何必如此忍心狠手于 祖 考則失孝于  
熹廟則失友是明咎 皇上以不孝不友矣夫之辨亦知今日要  
典之毀毫無損于 聖祖 神孫之孝慈而當日爭挺擊爭紅  
丸爭移宮三案諸臣原未嘗陷 主于不慈陷 主于不孝特  
群奸欲殺忠良苦無題目借此為罪案耳夫當張差之挺而馳  
至排闥直入也其有所使而然何待辨此而不問將亢圖魚腹  
踵發 禁廷 東宮危矣惟廷臣持破柱詰奸之威 神廟

光考自行燒梁獄詞之法父子兄弟間所全寔多止慈止孝得此  
益彰而謂諸臣陷主于不慈陷主于不孝不亦寬乎及

光宗嗣寶匣月之內雨露滂沱天下方慶萬年有道之長一旦哀  
思太過聖体恒羸崔文昇李可灼以瀉下之藥進鼎湖遽  
逝攀髯無策而涕泣呼號歸罪嘗藥此忠臣孝子痛極不擇音  
之言乃遽以悲憤呼號定諸臣不赦之罪及以聖躬嘗試之  
崔文昇立躋提鎮李可灼登用方新亦大不平矣至于移宮二  
案誠嫌太驟然當其時大故接踵朝野震驚官府徃庭危疑  
紛起誠早得元子升中出震以定群心則負宸臬鼎他何

暇恤彼謂宮眷必宜從厚者此痛定事後之言迨至 聖眷無  
改恩禮有加於 先帝之孝益顯惟日爭挺擊爭紅丸爭移宮  
而初無損于 三聖之孝慈則又何必劉志選徐紹吉諸奸勒  
成要典一書稱之為孝而後孝稱之為慈而後慈也如以為

先帝叙文必不可更彼偽祠之建偽爵之封位上公錫鉄券胙土  
田何一非稱 皇稱制奸人和黨正將借此以壓群愚欺當世  
而不知斯民三代之直斷不可枉也惟是功罪不明邪正顛倒  
所以辯言亂政邪說橫行伏祈 皇上將孫之緝立賜褫斥以  
為人臣無禮于 君者之戒疏入蕭山輩竭力調護得

旨孫之辯已經回籍詞林閒局不必過求

原任尚寶司卿黃正賓上聖世除惡務本疏畧曰前臣成大同  
日擊內鎮剋滅馬匹銀兩陽和各軍鼓譟毀官署叔典鋪將吏  
叩頭求免此時撫按脅于內鎮之威莫敢據寔奏聞違防迄今  
壞盡即一鎮可推各鎮也是奄宦者天下禍本也至交結近侍  
明律森然乃虎彪肆行而子孫蟪集究其為作俑者魏廣徵發  
蹤指示者徐大化也大化始以攻熊廷弼為媚璫贄見既而遂  
惡魏廣徵以担當共謀富貴某耳成某耳荆奪一二疏記與廣  
徵使大肆其排擠之毒手竄緣督理大工日奉魏忠賢色笑剋

減工銀無算最後私受銅商厚賄那借惜薪司錢糧二十萬拂  
忠賢之意勒令開住原疏可按也及觀逆賢將敗令表姪楊維  
垣疏叅崔呈秀以為翻身轉局地目今大化維垣雖奉譴斥  
潛居輦轂日與奄宦往來世界翻雲覆雨已三轉于大化之線  
索何叵測也時蕭山票旨有不必苛求句御批楊維垣不  
許潛住京師徐大化著回原籍

御史陳乾陽疏叅趙鳴陽曾入逆賢之幕育旨逮問先是有魏  
奄學顏者侍神廟久奏對便捷能解聖意神廟頗信任  
之光廟時即休退矣曾延吳江趙鳴陽訓其姪逆賢事敗乾

陽誤以學穎姓魏疑即逆賢故疏叅之後法司審鞠得寔鳴陽  
仍釋放回籍

上於潛卽留心時藝及入內合諸奄而試之出事君能致其身題  
取鄭之惠第一卽陞隨堂掌尚膳監印未幾乞休

上求治頗急 召對群臣多不稱 旨每加誚詰群臣愈惶悚不能  
置對惟長山條陳稍捷 上每溫頷以優禮之時紹寧楊維垣  
等相繼斥逐雖出 聖新而票擬多繇長山于是御史袁弘勳  
有疏攻之畧曰劉鴻訓一入黃扉楊、自得決句之間革職閑  
住無虛日最可異者楊所修賈繼春楊維垣夾攻表裏之奸有

功無罪而誅鋤禁錮自三臣始且軍國大計未暇平章惟亟毀  
要典謂水火玄黃是書為祟今毀矣水火玄黃息耶否耶未毀  
以前崔魏借之以空善類既毀以後鴻訓借之以殛惡良以暴  
易暴長此安窮御史高捷史蘊相繼糾叅錦衣張道濬亦有疏  
叅而工科賴繼祖出疏爭之且言道濬越位妄言亂政乞加重  
創時上傅諭欲將弘勛等重處鴻訓三楊力救乃免  
時當考館選龍飛首科例應加額侍讀張士乾上館額蒙恩  
疏內有准加六名以示優異之旨等語上因召對問士乾此  
旨從何而來士乾對此疏臣不與知乃新進士張星所作上曰

既不與知何以列名又曰既知張星名何又云不知士範對疏  
入後始知之 上詰責再四閣臣劉鴻訓奏此新進士功名念  
重致有此舉誠為可惡然在 皇上登極宏恩惟望 優容  
上乃命查寫本人來又 命士範具本回話後士範回話疏上有  
旨士範着回籍張星不准授官

周起元等之逮也繇于李寔之疏李寔已逮問大辟矣一日

上召對特宣刑部署部事侍郎丁啟濬問曰李寔一案有疑惑  
無疑惑有暗昧無暗昧啟濬奏奉 旨九卿科道會問通擬寔  
回奏 上問李寔何以當決不待時啟濬對李寔與李永貞構



殺七命不刑自招 上曰豈有不刑自招之理因問吏部尚書  
王永光王永光對李寔初不肯承及用刑然後承認 上曰重刑  
之下何求不得李寔為親忠賢追取印信空本令李永貞填寫  
如何含糊定罪啟濬對戚福出于 朝廷一憑 聖裁 上曰  
持法要平朕豈為李寔角五虎五彪緣何不問他決不待時後  
又召對 上特携李寔原疏示閣臣曰此李寔叅周起元等  
原疏御等可詳觀之看是硃在墨上墨在硃上諸閣臣詳覽良  
久俱對果是墨在硃上 上曰可見是空頭本復 命傳九卿  
科道遍閱皆如閣臣言於是 宣閣臣改票李永貞決不待時

劉若愚次一等李寔又次一等 按李寔空不是矣本內所列  
事款遠在江南係何人開送時為寔晉奏者孫昇也何不請  
提孫昇鞠問窮究到底即云填寫出于永貞次一等足矣何  
至又次一等也永光窺瞰 上意全無執持小人常態固不  
必言啟濬身任司寇不能執法廷諍乃以威福出自 朝廷  
一語卸責亦安用司寇為矣而閣輔科道諸臣俱無一言糾  
正此廷臣之所以見輕也至虎彪不問決不待時 天詔娘  
娘法司置面孔于何地竊謂蘓茂相等之罪尤浮于遂賢以

給事中韓一良有勸庶德貪疏深當 聖意因 召對出此疏  
覆閣良久命一良高聲朗頌甫讀畢取疏付閣臣閱劉鴻訓奏  
獎有兩端有交際有納賄 上問何謂交際鴻訓奏交際如親  
友問道之類情有可原納賄則希崇求寵便不可以數計矣

上曰朕閱一良所奏大破情面忠鯁可嘉當破格擢用可加右食  
部御史吏部尚書王永光承 旨因奏科臣露章必有所指乞  
皇上命科臣摘其尤者重處一二以為貪官之戒 上召一良指  
疏內開之有源導之有流等語著據寔具奏來一良對臣今未  
敢深言俟揀選平復之後具奏若納賄等事臣疏中原說風聞

不曾知名 上意怒曰難道一人不知遽有此疏限五日內具奏一良回奏叅周應秋闕鳴泰張翼明褚泰初後復

召對 上曰周應秋等自有公論張翼明己下部聽勘供無用爾叅又取一良前疏反覆展視 御音朗誦至臣素不愛錢而錢自至據臣兩月內辭却書帕計五百餘金以臣絕無交際之人而有此金他可知矣 上讀至此擊節感歎聲厲 問一良此五百何人所餽一良對臣有交際簿在 上固問之一良始終以風聞對 上遂震怒謂其以風聞塞責也 上即諭閣臣曰韓一良前後言有他前疏明：有人今乃以周應秋等塞責

都御史不是輕易做的要有寔功方許寔授劉鴻訓等合詞奏請臣不為 皇上惜此官但為 皇上惜此言 上愠色曰分明替他說話他既不知其人如何轉奏豈有紙上說一說便與他一個都御史復召一良面叱曰韓一良所奏疏前後自相矛盾類是肺腸大換本當拿問念係言官姑饒這遭

廷推袁崇煥為寧錦督師崇煥赴任陛見 上召問曰建部跳梁十載于茲封疆淪陷遼民塗炭鄉萬里赴召忠勇可嘉所有平遼方略可具寔奏米崇煥奏所有方略已具疏中臣今受皇上特達之知願假以便計五年而建部可平全遼可復矣

上曰五年後遼便是方畧朕不吝封侯之賞卿其努力以解天下  
倒懸之苦卿子孫亦受其福崇煥謝恩歸班上暫遲少憩  
給事許譽卿面叩五年之畧崇煥言聊慰聖心耳譽卿言

上英明甚豈可浪對異日按期責功奈何崇煥慨然自矢頃之  
上出崇煥即奏東建四十年蓄聚此局原不易結但皇上留心

封疆宵旰于上臣何敢言難此五年之中須事：應手首先錢  
糧上即諭戶部署部事右侍郎王家楨着竭力措辦毋致不  
充于用崇煥又請器械謂東建蓄謀已久器械犀利馬匹調習  
今後解邊弓甲等項亦須精利上即諭工部署部事左侍郎

張維樞今後所解各項須鑄定監造司官及匠作姓名若有脫  
簿不堪者挨查究治崇煥又奏五年之中事變不一必須吏兵  
二部俱應臣等所常用之人即與選授所不常用者勿致濫推  
上即召吏部尚書王永光兵部尚書王在晉 諭以崇煥意煥又  
奏以臣之力制全遼而有餘調衆口而不足一出國門便成萬  
里忌功始能夫豈無人即凜：于 皇上之法度不以權掣臣  
之肘亦能以意見亂臣之方畧 上起立佇听者久之尋  
諭曰卿條對方畧井：不必謙遜朕自有主持間臣劉鴻訓等俱  
奏請假崇煥便宜 賜之南方至如王之臣滿桂之南方應行

撤回以一事權 上深然之 命閣臣擬 諭來看

廷推王象乾以原官提督宣大 陛見 上召同閣臣皆入檻

內去 御案咫尺蓋異數也 上曰卿三朝元老忠猷素著見

卿雙蹠知袁崇煥薦舉不差有何方畧可面陳米象乾奏臣年  
踰八旬齒蹠不能詳奏所有方畧具在疏中 上問閣之象乾

先叙揀漢卜哈諸酋離合始末因奏朵顏等夷三十六家今日

應與哈慎一同連絡可得數萬安插薊鎮沿邊駐牧為我藩籬

似亦可數揀苗 上曰觀前意似不肯受撫者象乾奏從容籠

絡撫亦可成 上曰禦夷當恩威並濟不可專恃羈縻閣臣劉



鴻訓奏聞虎前知王象乾至退去六百餘里 上即問退去在  
何地方鴻訓不能對象乾代奏退去直北沙磧中 上又問倘  
款事不成如何象乾密奏夷情約數百言 上始色喜隨

諭象乾曰卿年雖踰八旬精力尚壯朕心嘉悅卿撫犂苗于西  
崇煥禦虜于東恢復功成皆卿等之力也象乾與閣臣俱叩首  
而退

按崇煥原知遼不可復冀以款羈縻歲月耳觀其舉薦象乾意  
可知矣蓋象乾專主撫也象乾既赴任專任犂苗撫賞事宜舊  
例屬夷出馬中國出絲綢互相貿易名曰馬市虜中駒初生繫

其母于山頂駒從下一躍而上者留充馳驅躍至半而踣者殺  
以為食其懦不能躍者則以與中國為市象乾建議虜中既以  
駑馬相欺不若却其馬而以償之半與之少司馬中公用懋持  
不可謂虜所市馬誠不堪用然每歲徵馬以萬計于虜不無少  
損且以幣易馬尚有名可攀今無故歛繒幣與之去歲幣幾何  
母乃為 朝廷辱乎又棟索數甚奢申公謂遽損其數虜未必  
俯首听命塞外舊棄地甚多盍以秦寧等地為名虜能歸我舊  
疆我當如虜所請虜必不肯割地然後減損其數在我為有辭  
矣時象乾老無遠圖當事者急欲成功遂且從事未幾棟前

內犯關入大同殺僇甚慘撫終不可成而浪擲金錢蓋幾十萬云

上勵精圖治而念切民艱給事中黃承吳而陳水利因言東南時  
患水災皆水利不修之故上問水利何為不修閣臣周道登  
錢龍錫同奏水利是東南第一大事但修理須要錢糧臣等前  
已擬 旨着撫按酌議具奏上沉思久之曰要修水利可撥  
民否龍錫奏臣等惟恐擾民故行彼查撫按酌量御史毛羽健  
有疏請蘇驛遞上命羽健自讀因諭閣臣曰驛遞疲困已  
極小民敲骨及髓為不歡蹄人不思有朕甚恨之若不痛革民

因何由得蘇卿等可即擬票來及票至 上以票內有撫按司  
道公務外俱不許違白牌語屬含糊復命改票御史高欽爵奏  
請令各邊開爐鑄造軍器 上問可行否聞臣皆奏可行 上曰  
何謂可行李標奏各邊自為禦夷計定常堅好 上曰此非  
祖制御史梁子璠疏請汰兵餉內有各邊虛冒等語 上召戶兵二  
部問兵餉何以冒濫至此戶部署部事侍郎王家楨同兵部尚  
書王在晉奏兵餉冒濫已久各邊有事督撫累次請添兵增餉  
情弊已非一日又請至老弱之人曾荷戈而弗克 上矍然曰  
荷戈者皆老弱豈能禦敵如何不查即 勅戶兵二部速還撫

幹司官往各邊查核具奏

上因召對特命科道等官至御前諭曰朕恐進賢退不肖故令爾等為耳目司舉劾就中不無冒濫爾等試自思之所舉者果人：皆賢乎所劾者果人：不肖乎朕曾降諭切責有反坐二字以求直言今又面諭爾等若藉口不要：科道官何用上之教：求治求言若此

袁崇煥至錦州連疏請餉上御文華殿召百官諭曰崇煥前云安撫錦州兵變可弭今又云軍欲鼓譟求發內帑與前疏何相矛盾卿等奏來時百官有請允發者有請發內帑者

上詰問戶部時尚書畢自嚴甫屢任極言戶部缺乏容當陸續措給上曰據崇煥揭云初三日即變今已初二即此時發去已遲何救于鼓譟上又曰將兵者果能如家人父子自不敢叛不忍叛不敢叛者畏其威不忍叛者懷其德如何得有鼓譟之事上又曰內帑外庫俱係萬民脂膏原用以保封疆安社稷若發去果寔有用朕豈吝此禮部右侍郎周延儒奏曰國家最急無如關門但昔止防虜變今并防兵變前此寧遠鼓譟不曾震得流水發餉與他今又鼓譟請發內帑各違教尤將何底止上曰卿以為何如延儒奏臣非敢阻皇上發帑此時安危在呼

吸間急則治其標固當與之然非長策還望 皇上集廷臣從  
長計議畫一經久之策 上曰此說良是若事急專一請節各  
邊比例這內帑豈不涸之源何以應之 上又曰爾等不肯大  
破情面極力担當動稱邊餉缺乏朕每下旨嚴催通不見解來  
即如贓銀充餉至今不解豈價行查至今不曾回奏如此拖欠  
稽遲糧餉何時得足 上又曰你們每：上疏求舉行召對文  
華商確猶然事：如故將召對都成舊套商確俱屬虛文何曾  
做得一件實事米 上又曰朕自即位以來孜孜求治以為卿  
等當有嘉謀奇策召對商確之時朕未及周知者悉以入告乃

俱推諉不知朕又何從知之時 天威震訊憂形于色大小臣  
工皆戰懼不能仰對而延儒繇此荷 聖眷矣時十月初三日  
也

棟甫入犯大同總兵梁家楨閉門不出任其殺掠 上召百官  
諭曰朝廷養士費許多兵餉一遇虜至便束手坐視只曉得請兵  
請帑 上又曰棟甫殺慘人民滿載而歸巡撫官不能防禦是  
功是罪朕之封疆止伏一喇嘛僧講款不令虜輕中國耶  
上又曰講款一面講款整飭着定整飭難道中國就勝不得他  
上又曰今邊疆失事只叅總兵等官難道叙功不升文官朦朧偏



心朕甚患之後渠家禎辨疏至 上示閣臣俱言大同失事甚夥家禎擁兵坐視豈能逃罪 上曰督撫如何今十餘兵馬便要去數棟苗十餘萬衆渠家禎既有罪督撫作何事劉鴻訓奏武臣在外提兵文臣在內調度 上曰文臣還當節制武臣今督撫一向人馬不行操練平日虛冒臨敵張惶以千餘弱兵抵十萬棟苗卿等試思如何抵得鴻訓奏 皇上責降文臣極是但自 皇祖靜攝以來至 先帝時二三十年邊備廢弛已久一時猝難整頓 上曰而今何如錢龍錫等俱奏而今比前大不相同 上曰此俱是贊揚之詞尚未見行一寔事如何便見

不同嗚呼有君無臣之慨 上已顯然于言外矣

阮大鍼之逐也果擬出長山手大鍼先喉索弘勛等攻之不動  
因日夜伺其短而長山恃有 聖眷頗肆搖擺復向人語

皇上畢竟是冲主隨有布此語于宮中者 上聞之怒甚遣有擅  
增 勅書之事長山遂膺嚴譴

惠安伯張慶臻營謀管事用賄于長山於 勅書內擅增數字  
大同失事本兵王在晉隱匿不以寔告御史吳玉上疏叅劾

上召對命吳玉宣讀 畢 上問閣臣李標奏在晉屢被人言宜  
放他去 上曰此事只有一个是非封疆大事中樞重任自有

祖宗之法如何只教他去便了

上又問閣臣張慶臻改勅書一

事卿等豈不知道卿等先奏兵部有手本慶臻有揭帖豈有不  
知 上又問慶臻不上本如何敢送私揭慶臻奏臣以一時盜  
賊生發不及上本又係小事不敢瀆奏 上曰改勅書怎云是  
小事因令諸臣奏來戶部尚書畢自嚴等俱謝不知 上曰卿  
等在外邊都是知道的今乃說不知又令科道官奏來給事中  
張延陽奏張慶臻用賄改 敕書是寔李覺斯與御史王道直  
俱奏如延陽言但不知主使何人吳玉奏主使係劉鴻訓張慶  
臻奏辨改 敕書係中書之事臣寔不與知吏部左侍郎張鳳

翔奏慶臻用賄改 教竊弄兵權大不教無人臣禮中書不通  
順指氣使之人如何擅敢改 教閣臣李標等合詞奏臣等與  
鴻訓同事並不聞有此運求 皇上細訪 上曰這樣明講何  
須更訪即令閣臣擬票閣臣逡巡未即擬 上正色嚴促者再  
乃擬 旨鴻訓慶臻俱革職聽勘又吳玉疏內有時局字  
上問何謂時局玉奏如當初是魏忠賢的局面而今是 皇上的  
局面 上怒曰如何將魏忠賢比朕又吳玉奏事時給事中熊  
奮渭私議疏中開國元勛等語為非是其聲頗高 上問班中  
有聲是誰奮渭長跪待命候 召對畢與百官同出隨傳 旨

熊奮渭着降三級調用後部院會勘有 旨王在晉革職回籍  
劉鴻訓附近充軍

袁崇煥屢疏請餉 上召對諭諸臣曰袁崇煥在朕前以五年  
後遼及清慎為已任這關餉事須講求長策又曰關兵動輒鼓  
譟各遣效尤誠何底止禮部右侍郎周延儒奏曰軍士要挾不  
止為少餉畢竟別有隱情古人羅雀掘鼠軍心不變今各兵止  
少他折色未嘗少他月餉如何動輒鼓譟此其中必有緣故  
上曰正如此說古人尚有羅雀掘鼠的今惟缺餉豈遂至此羅雀  
掘鼠四字深契 聖心延儒之眎：于枚卜其衷愈熟矣

上一日御講筵問閣臣曰宰相須用讀書人當作何解周道登對曰容臣等到閣中查明回奏上始有愠色繼而微笑嘻甚矣上又問閣臣近來諸臣奏內多有情面二字何謂情面周道登對曰情面者面情之謂也左右皆匿笑

上究心利弊尤留意邊防各邊以缺餉告司農仰屋無計上曰召對諭諸臣曰朕記得先年有大工有生祠多少錢糧無日不進益有發有餘今大工完了生祠毀了如何不足前日又撤了各處內鎮便該有許多錢糧下來那裏去了戶部尚書畢自嚴奏外解不能全完所以不足上問外解何以不全完上

又曰太倉銀兩原非違用如何急了便要請帑朝廷給餉養兵  
原期實用如此動輒敷課養這騎兵何用隨 諭自嚴卿到部  
裏將新舊錢糧都要徹底澄清逐一查算具奏

按 祖制省直各有預貯銀兩以備急用多者幾十萬少者十  
餘萬如薊鎮則有銀八萬五千有奇貯遵化縣庫名曰備邊  
江南有銀十萬兩有奇貯鎮江府庫浙江有銀十七萬兩有  
零貯温州府庫名曰備倭他省倣是地方猝有變亂不須催  
科不支官帑事可立辦自魏忠賢生祠開端咸取給于是造  
祠者十之二三餘皆入撫按司道私囊中矣斯時若大臣有

留心國計者委曲詳列其弊并請嚴查各遵各省脩造脩倭原額錢糧幾何生祠開銷幾何即勒令建祠撫按司道始額補償遴選風力科道究竟其事俾國家收士飽馬騰之用而氓庶免頭會箕歛之苦且使世之為貪吏有餘財者知法制嚴明不敢恣其谿壑亦救時一策也惜乎廷臣平日毫不究心無以慰

聖天子焦勞至念自此以後帝意天下自有餘財群臣不肯寔心任事雖兵荒游臻言賑言蠲皆置不省嗚呼真千古有餘痛矣

天啟元年辛酉虞山錢謙益以編修主浙江試歸安韓敬與秀



水沈德符預捏字眼假稱關節令人遍投諸應試者約以事成  
取償浙士子多墮其網中錢千秋預焉千秋字眼以一朝平步  
上青天七字為七藝之結謙益在閤中弗暇察也比徹棘敬等  
即發覺其事倭倭禮科顧其仁磨勘叅送謙益亦自具疏檢舉  
奉 旨下部：擬千秋與居間徐時敏金保玄俱依律遣戍謙  
益與本房鄭履祥失于覺察各罰俸三個月奉 旨依擬此天  
啟二年事也後時敏保玄在獄病故千秋發東勝右衛前所充  
軍收管存案隨遇赦撫按給帖釋放事結久矣時當枚卜廷臣  
共推較謙益而宜興周延儒以 召對教語上契 聖衷若一

列名必蒙 點用延儒又結好于戚畹鄭養性萬煒及東廠唐之微以為內援給事中瞿式耜恐兩人不能並相因力阻延儒延儒大不堪時吏部尚書王永光杜門乞休勢在必去御史梁子璠特疏欲令侍郎張鳳翔代行會推廷議以尚書現在無侍郎代行之理于是式耜疏請永光料理枚卜然後听其去永光遂開籍見朝會推疏上首成基命次即謙益而延儒與溫体仁俱不得預延儒暗布流言謂此番枚卜皆謙益黨把持

上聞會推無延儒名遂入其說体仁乃上直發蓋世神奸疏即舉千秋閣節事恭謙益上為召百官面訊謙益奏辨千秋閣節

已經疏奏刑部勘問明白現有案卷在部體仁奏稱千秋在逃  
過付者為徐時敏金保玄二人提至刑部親口供收謙益如何  
隱得彼此質辨良久上命辨疏與奏疏俱取來上問體仁  
疏內稱神奸結黨欺君奸黨是誰枚卜大典誰人一手握定體  
仁奏謙益之黨甚多臣還不敢盡言至于此番枚卜皇上務  
求真才其實都是謙益主張所以說一手握定上又問納賄  
是誰體仁奏即是謙益史料都給事中章光儒奏錢千秋一事  
久經問結體仁資俸雖深品望甚輕會推不與遂不勝熱中如  
謙益關節果真何不糾于未枚卜之先今會推疏上點與不點

一昨 聖裁休仁奏科臣此言正見其黨謀益蓋未枚卜之先  
不過冷局叅他何用糾之於此時正為 皇上慎用人耳允儒  
奏從來小人陷害君子皆以黨之一字昔年魏廣微欲逐趙南  
星楊漣等子曾推䟽中使魏忠賢加一黨字盡行削奪留傳至  
今為小人害君子之榜樣 上怒叱曰胡說御前奏事怎這樣  
胡扯拿了時無人承 旨 上問錦衣衛何在衛帥承 旨將  
允儒扶出休仁又奏 皇上試問冢臣王永光要奉 溫旨何  
以不出直待瞿式耜有䟽完了枚卜大事然後听其去是冢臣  
去留 皇上不得專主有此事否謙益熱中枚卜先使梁子璠

上疏欲令侍郎張鳳翔代行會推此從來未有之事

上召諸

臣問曰朕傳旨敕卜大典會推要公如何推這等人是公不是  
公王永光奏 皇上召問吏科河南道與郎中耿志煇便知道  
了休仁奏王永光是六卿之長用賢退不肖是他的職掌如何推  
在司官身上河南掌道御史房可壯奏臣等都是公議 上曰  
會推大事其中推這等人還說是公議諸臣奏未聞臣李標等  
俱奏閑節與謙並無干休仁奏分明滿朝都是謙益一黨臣受  
四朝知遇忠憤所激不容不言閑節是真若不受賄如何得中  
況今錢千秋現在京師日入謙益之幕指望謙益入閣希圖辭

復使謙並可以枚卜則千秋亦可會試李標等又奏前次招問明白上曰招也極悶燥不可憑據禮部右侍郎周延儒奏

皇上再三下問諸臣不敢奏者一者惧于天威二者牽于情面

總之錢千秋一案關節是真現有招集硃卷已經御覽詳明

關節已有的據不必又問諸臣上又詰問諸臣曰朕着九卿

科道會推使推這樣人就是會議今後要公若會議不公不如

不會議卿等如何不奏延儒又奏大凡會議會推皇上明旨

下九卿科道以為極公不知外廷止沿故套只是一兩個人把

持定了諸臣都不敢開口就開口也不行徒然言出而禍隨

上命再奏延儒復奏如前体仁奏臣子身孤立滿朝俱是謙益之黨臣疏既出不惟謙益恨臣凡謙益之黨無不恨臣、一身豈能當衆怒臣叨九列之末不忍見 皇上焦勞於上諸臣皆不以戒惧為念不得不叅懇乞 皇上罷臣歸里以避兇鋒

上曰卿既為國効奸何必求去時謙益伏地待罪 上命出外候旨次日奉 旨錢謙益既有議論著回籍听勘錢十秋法司提問又章允儒房可壯各具疏認罪翟式耜梁子璠各具疏回話有旨俱著降三級調用

已而御史毛九華疏糾溫体仁遂祠獻媚詩冊任贊化疏糾体

仁居鄉不法事

上召對休仁奏臣若有媚璫祠詩必以手書

為贊萬無木刻之理既係刻本必流傳廣布何以兩年來絕無人論及且此冊何不發于籍沒逆璫之時而待于九華之手乞皇上勅下該部嚴究所刻之人此詩從何得來則真偽立見若但以刻本為據則刻匠遍滿都城以錢謙益之力何所不可假捏上如言詰九華九華對八月買自途間上曰八月買的如何到今總發九華對臣十月考選休仁奏臣叅錢謙益在十一月九華叅臣在十二月九華既得此冊何不即具疏特糾冊中媚璫諸人而但于條陳疏末單指臣名種：真情已白華露上問



閣臣如何說首輔韓爌奏休仁平日矜：自守亦有品望但因  
叅論枚卜一事情激過當致犯衆怒所以諸臣攻他休仁奏臣  
通籍三十年並無一字掛人彈章只因叅了錢謙益攻者四起  
凡可以殺臣逐臣者無所不至豈臣一人之身賢奸類異至此  
毛九華係謙益之黨無疑 上曰溫休仁也辨得吳又 召御  
史任贊化 上曰毛九華叅溫休仁一疏尚且不真滿如何叅  
他許多無根之言如此叅語在御前讀奏休仁奏贊化疏全是  
誣捏凡宦遊臣卿者俱可問即如說臣與陳與郊兄弟姻家此  
一查可明事：無影虛捏如此贊化奏臣之所言不過株訪公

論長安萬口如一体仁奏長安萬口如一試令贊化舉一二人  
皇上召問之臣果有此事否上曰朕自有鑒載体仁奏去年謙  
並未入都門贊化代謙益首攻御史陳以瑞以瑞係崔魏削奪  
皇上賜環之人因曾參謙益科場之事贊化反以媚璫糾之及謙  
益入都把持吏部覆之為民此贊化為謙益死黨之一証也去  
秋皇上未有枚卜之旨贊化特出薦相才一疏蓋為謙益  
而發至稱謙益為伊周之班行此贊化為謙益為黨之二証也  
若謙益幸入綸扉贊化自居擁戴首功一旦被臣參破故恨臣  
最深誣臣最甚贊化奏陳以瑞部覆冠帶閑住皇上獨斷著

他為民体仁如何力保以瑞体仁奏臣非敢力保陳以瑞只因  
以瑞曾奏謙益故贊化運將以瑞奏論 上曰不必多奏候  
旨行自是体仁以告訐見知於上結黨之說深啟  
聖疑攻者愈力而 聖疑愈堅矣

江西庶吉士朱統錦與吳江相公有交其得館選也吳江為之  
道地雖云無私而寔有意給事中間可陞疏攻吳江并及統錦  
有 旨朱統錦着仍選中書周道登准回籍調理後統錦朦朧  
起授簡討 上亦弗深究也

上一日御 日講：官徐光啟講中庸畢 上忽問曰既云知天

地之化育又云其孰能知之是同是與光啟以化育分內知孰能知分外知 上哂曰知也有內外的年終講官叙勞內閣題光啟以禮部侍郎加 太子賓客昭舊日講 上抹去昭舊日講四字

二年己巳二月初四日 皇長子生 中宮周后出我明 中宮無生子者三百年來 周后一人而已

攷 聖躬燕寢之所為屋三楹而不並列繇第一間而後第二間而後第三間其第三間 聖躬宴息處也其第二間具大薰籠貯衾綯之屬凡 召幸宮眷至第一間則盡却諸裳衣裸體

至第二間取衾衲被身乃進至第三間所謂北衾與衲也即

中宮與東西兩宮赴召不敢不遵用此禮惟先后以魯同

糟糠不肯赴召又聖駕幸中宮舊例聖母趨出宮門

外接駕先后亦以糟糠故廢此禮不用

蒲州再召適當推敵逆案右庶子楊世芳其姻家也世芳乃纂修三朝要典者自應入逆案中蒲州力庇之薛國勣亦以沈維炳護持俱邀漏網而同事朱繼祚余煌等張維一袁鯨等皆援例格外矣以此蒲州相業頗不協人心

工部節慎庫主給發商人上供額料銀兩最稱獎款設有監督

主事一員巡視科道各一員所以整奸剔弊計至詳也而諸府  
奸吏甚四月 上特發其弊監督主事劉鱗長巡視給事中祖  
重燁御史高賚明俱下獄因追論元年同事諸臣惟重燁與御  
史吳阿衡狼藉頗著復徵阿衡下獄鱗長賚明以無染止行降  
調阿衡于邊警時以邊才拔為監軍御史重燁遣戍

烏程既特疏叅虞山宜興復于 召對 佐成之舉朝皆與為教  
彈章如羽 上堅留不放時有四凶之目指烏程長垣宜興及  
少司馬也八月部推烏程為南京禮部尚書以駱從宇陪推大  
理寺卿康新周為南京工部侍郎以何喬遠陪 御筆俱點陪

喬遠以尚寶御請告林下僅五品耳而躡躡九列則烏程之提  
挈也

九月河南道驛傳道缺推原任副使路周賀填補領 敕之日  
適 上正視朝路老邁甚支離萬狀 上傳誦閣臣云路周賀  
舉步蹣跚語言蹇蹇河南雖不是遣道驛傳也不是容易做的  
卿等還傳與吏部知道出言成章真 天縱也

於時有三盛事皆非人力可強致者一則錦衣徐本高之八世  
一品也本高為文貞公玄孫文貞前以少傅贈其曾祖父如其  
官連本身四世一品矣本高承文貞武蔭歷官都督同知際遇

覃思亦得贈其曾祖父如其官連本身亦恰四世一品雖搃由文  
貞推思而一人不中折一人不重疊恰符八世俱腰玉稱一品  
亦宇內所希覩矣一則南海黃士俊之父也士俊登萬曆丁未  
狀元歷官禮部尚書除過覃思封其父如其官連值百歲士俊  
給假歸家稱觴有旨准與建坊錫名熙朝人瑞夫百歲稱觴  
異矣乃其子以尚書頻首堂下已亦受尚書封緋袍犀帶稱百  
歲老臣且邀有煌天語不尤異乎一則晉江楊玄錫也玄  
錫登崇禎甲戌進士年終十六釋褐之日髮僅覆額所謂其位  
可致其年不可倖也



浙江總兵王光有病不任事寧紹副將林某勇而且廉當事者擬以林繼王之座林亦頗有望蜀之思遣役入都修候王亦遣役入都兩役交遇于職方之門王役謂林謀據其主之缺也不勝其怒遂揮老拳林役不敢抗辰側之際所貴候儀墮地事既喧傳不可終隱職方郎中方孔炤具疏叅林有 旨革職捉問人皆寃之

琉球國王新立遣使告知且請受 封舊例給事中行人各一員充正副使時科已推山東杜三策行人應屬江西蕭士瑋次則山東孔聞籍兩人交相推諉至詎詈于司正楊梅之門梅不

勝其憤遂自請行有旨楊掄歸陞京堂用蕭士瑋降三級調外任孔聞籍不准考選調南京用掄與三策皆賜一品服以是年九月出都至六年八月始克航海完冊封事歸時颶風大作幾葬魚腹七年二月復命三策陞太常寺少卿掄陞尚寶司少卿掄以驚悸成疾未幾卒聞籍後陞陝西寧兵備道有番夷之變聞籍合家自焚

陝西飢民倡亂蔓延廷推楊鶴以兵部右侍郎總督全陝上召問方畧鶴第以清慎自持撫恤將卒封先是天啟丁卯陝西大旱澄城知縣張程等催科甚酷民不堪其毒有王二者陰糾

數百人聚集山上皆以墨塗面王二高唱曰誰敢殺張知縣衆  
齊聲應曰我敢殺如是者三遂闖入城守門者不敢禦直入縣  
殺耀米衆遂圍聚山中巡撫胡廷宴老而髦置之不問又延慶  
連歲荒旱去冬有王嘉胤者倡亂于府谷蔓延于西漢以南今  
春延綏巡撫岳和聲陝西巡撫胡廷宴各報畧陽淳化綏德宜  
川等處流賊孔棘鄖陽撫治梁應澤亦以漢南盜告急二月商  
維兵臨劉應遇率毛兵至漢中合川兵擊賊：奔漢陰應遇進  
斬五百餘人誅其渠魁十餘人餘悉北走漢南盜平八月賊復  
犯耀州叅政洪承疇合官兵鄉勇共萬餘人擊賊于雲陽敗之

賊夜乘雷雨掠淳化入神道嶺此流賊之始也

九月奢安二酋平先是土司奢崇明安邦彥先後稱叛雲貴不靖者七年于茲去冬復起復朱燮元總督雲貴川湘廣西五省專任討賊而賊據大方阻險負隅崇明僭號大梁王邦彥自稱四裔大長老謀先犯赤水後取永寧燮元偵知之命守將許成名佯北誘賊深入度賊已抵永寧分遣林兆陽從三岔入王國楨從陸廣入劉養鯤從遵義入邦彥分兵四應力頗不支復遣監軍副使劉可訓同降將羅象乾以奇兵繞出其背夾擊之賊大驚潰崇明邦彥皆殁于陣官兵斬其首以獻捷聞燮元等俱

進爵費銀幣于蔭有差御史毛羽健疏請添設永寧巡撫即以劉可訓為之以靖地方以勸勞臣不報

是冬擬冊立東宮中外皆望大赦九月二十六日上召閣

臣進先已素袍角帶決意行刑二十七日御筆勾逆案倪文

煥李燮龍梁夢環田吉封疆則總督楊錫撫臣張翼明總兵梁家禎監督則工部高道素俱死西市道素偕內臣黃用督造

桂王府第時惠王封荊州桂王封衡州並在湖廣筭計者

憶揣就國必以高序經費每惠荆緩衡天啟七年夏桂王之

國距惠王僅數日巡按溫臯謨疏乞展期逆奄矯旨切責

有司倉皇那濟道素與用盡工趙造道素督正殿以外用督寢  
殿以內皆潦草塞責今年三月初三夜大風雨雷震寢殿壓死  
宮女六人以後每遇風雨王同諸宮眷即露立庭中蓋深屋  
覆壓之惧也事聞黃用司禮監拿問道素草職法司究問用獄  
未具道素在刑部先擬贖徒御史董羽宸疏激上怒屢誚屢  
駁加等論死至是勾及之間臣韓爌以為請上曰朕若出祀  
藩邸這就是榜樣高道素監造王府而使數百宮人死于非命  
即寸斬之未足蔽辜又何請焉是日道素意必無他虞沉醉以  
往及行刑則已醒矣倉惶不能出一語但連呼如何如何而已

人多寃之黃昏大雨雪

十月之朔上御殿領曆忽有聲寃自列于丹墀者寃竟之乃民間詞訟事其人刎而不死上命刑部提問其事立案不行時先文肅語當事曰此怪兆也宜修邊備逾月即有遼警

毛文龍向為遼東叅將遼陽陷沒文龍逃至海濱適有難民數千人文龍以術籠絡之遂同航海至皮島蓋皮島居遼東朝鮮登萊之中稱孔道文龍斬荆棘具器用招集流民通行商賈南貨繒幣北貨參貂咸于文龍處輸稅掛號然後敢發不數年遂稱雄鎮又掠沿海零丁或指建州奸細或稱臨陣斬獲以是積

功官都督掛平遼總兵印逆賢時各遣出內奄鎮守文龍亦疏  
請內奄監其軍 上即位嚴核軍餉 赦下山東撫按檄登萊  
兵脩王廷試往廷試多欲人也既飽其欲遂感誦文龍忠勇可  
用士飽馬騰絕無破冒文龍亦憚 上英明思有以自立乃通  
情于清額捐金二百萬易金復二衛地奏恢復功邀上賞已成  
約矣袁崇煥督師出關 上召問方略以五年平遼為期及屢  
任覘知文龍有成約急遣喇嘛僧入清啖以厚利欲解文龍議  
以就己而清最重盟誓堅持不可強之再四不听喇嘛僧曰今  
惟有斬毛文龍耳在清不為負約在我可以收功崇煥遂以聞



武為名直造皮島大閱軍士文龍置酒高會次日文龍進謁崇  
煥亦置酒留宴酒半稱有密旨即座中擒文龍斬于轅門外  
時崇煥立營嚴整衆亦不敢犯文龍部下千餘人散往他處餘  
衆悉就撫事定然後入告朝廷亦姑容之時七月間事也先  
是崇煥出都閣臣錢龍錫叩以遼事答以當先從東江做起龍  
錫謂舍寔地而問海道何也且毛帥亦未必可得力崇煥云可  
用則用之不可用則殺之至是疏中即入錢語上以問龍錫  
龍錫謝寔有之而文龍既殺之後清未索賂崇煥無以應特疏  
請增餉三百萬謂五年之後全遼皆復并從前所加各項皆可

芻除此一勞永逸之計也

上集群臣廷議皆執奏不可崇煥

計無所出遂听清入犯由喜峰口馬蘭谷松棚路闌入直抵遵化時新令嚴汰元兵被汰者陰謀為亂清兵臨遵化城下薊撫王元雅尚汰兵四百人兵即開門延師元雅死于亂軍中清兵遂破三屯薊鎮總兵朱國棟自縊山海總兵趙率教統兵赴援營于七家嶺猝與清兵遇衆潰率教死之報至舉朝震恐

上命薊遼總督劉策戴罪立功控扼石門以防西轍又

命保定巡撫解經傳同倉場總督南居益駐守通州專護倉儲又命太監李鳳翔提督京宮與總協二臣料理城守又命兵部急

徵宣大山西兵入衛

枚卜一案以烏程虞山故高閣不行至是蒲州乞休力請點  
用十一月初六 上點大名成基命一員至歲底復 點桐城  
何如寵又于會推外 特點宜興周延儒及會稽錢象坤共四  
員

王在晉被譴後 上召對群臣陞工部右侍郎王洽為兵部尚  
書洽山東人相貌極偉岸 上私語云好似門神卜者周生聞  
之曰中樞之座不久矣以門神一年即易故也至是 闕入  
十一月十一日 上召對禮部右侍郎周延儒奏中樞備禦疎

虞調度乖張既不能預授方畧拒敵于塞外又不能整搦兵馬  
殲敵于域中誰任中樞決裂至此檢討項煜繼之且引 世廟  
庚戌丁汝夔故事云斬一丁汝夔將士震悚唐聞風宵遁  
上遂下王洽于獄說者謂既例丁汝夔必有為楊守謙者矣  
以左侍郎申用懋代王洽陞口北兵備梁廷棟為順天巡撫起  
舊帥楊肇基為薊鎮總兵起舊輔孫承宗于家督師通州

詔天下勤王

申甫者遊棍也始為僧蹄本初游滇黔中得彼中役鬼之術小  
試輒驗庶吉士金聲薦之 上召問頗惑其術特授為副總兵

捐內帑十七萬金听其造車募兵之用授金聲為御史監其軍  
時庶吉士劉之綸四川人請纓甚銳上壯其志超授兵部右  
侍郎募兵勦虜

大同總兵滿桂夷種也勇悍敢戰率兵五千入衛營於德勝門  
外虜騎以十一月初三破遵化十五日至壩上二十日薄都城  
自虜衝突而西從城上望之如黑雲萬朵挾迅風而馳洎史已  
過滿桂身帶重傷血染征袍而存僅三千人

袁崇煥入援抵都城下上召對問行間方畧賜御膳解

上所御貂裘被之與祖大壽皆賜盔甲一副然崇煥雖名入援

听内骑叔掠焚燒民舍不敢以一矢相加遺城外戚吮貴園  
亭庄舍為虜騎蹂躪殆盡皆比而揭其罪狀入告民謠云殺了  
袁崇煥鞭子跑一半兼崇煥出言無狀對百官訟言鞭子此未  
要做皇帝已卜某日登極矣戶部尚書畢自嚴至橋舌不能下  
舉朝皆疑之

閩部孫承宗雖奉 命督師通州而南居並解紐傳皆不受調  
度時都城盛傳通州三河等處皆陷承宗遣人賫奏至 上喜  
曰通州固無恙乎即奉 旨督撫等官俱听樞輔節制  
時廷臣請纓者甚衆祭酒顧錫疇願任募兵可得二十萬人簡

討項煜薦舉尚書李騰芳可當大任又請 面對者不一而足  
上傳各官俱於本衙門實修職業諸臣俱廢然而退

十二月初一日 上復召袁崇煥祖大壽入 上溫顏諭大壽  
而歷數崇煥之罪遂擒崇煥下詔獄閣臣力諫謂臨敵易將兵  
家所忌 上曰勢已至此不得不然大壽出朝悍然竟率眾東  
行 中朝無可如何 敕閣部孫承宗撫諭之

初二日 上以城守潦草下工部尚書張鳳翔于獄營繕司郎  
中管玉音虞衡司郎中許觀吉都水司郎中周長應也田司郎  
中朱長世俱 廷杖八十臨時閣臣合詞祈請寬宥 上曰目

下與園止隔一牆 宗廟社稷都靠這堵牆若這牆一倒 宗廟社稷都沒靠了豈可不重慶時觀吉兵應以年老長世以羸弱俱斃杖下玉音杖單下獄與鳳翔俱擬贖徒

上既下袁崇煥于獄校滿桂為總理宣府總兵侯世祿昌平總兵黑雲龍等皆屬焉又起舊帥王威尤岱楊御番孫祖壽出罪帥馮世龍于獄俱以原官立功桂以十六日誓師而南十八日遇南兵于良鄉時南騎皆倣官軍服飾桂以為援兵不設備南騎乘不意掩之全軍殲焉桂與尤岱孫祖壽皆死之南騎亦飽掠得意二十三日斃頭盡望東而行都城始解嚴先是桂乞餉二



萬金遍餽諸臺省每人五十金然後出師

申甫漫為大言其所募兵皆乞丐子及傻人三尺童子知其必敗亦以十六日誓師至蘆溝橋猝與鹵兵遇所造車既不可用試術復不驗所統七千人號而受刃猶韋而不為郭京之續也金聲以在城中得免

劉之綸募兵近萬人尾鹵兵而東適鹵兵有零騎從後驟至之綸急營于了髻山上鹵兵立營山下絕其水道次日衆潰不能師之綸遂遇害

劉愛埴者遼人也蒞孫閣部標下改名興祚自鹵兵入犯從無

敢與聞者劉率勁卒千二百人夜搗其營殺酋兵千八百人奪  
回器械牛畜無算天明解赴閩部軍前虜令鉄騎追及于半途  
劉誓死闘殺數百人而後援不繼力竭以死千二百騎殲焉  
孫閣部䟽請立廟 賜諡 廷議不一遂不果

二十二日 上召侍郎周延儒羅喻義李成名河道總督李若  
星御史饒京喻思恂趙廷慶又 召吳阿衡于獄中 上面詢  
方畧延儒但言願捐軀報國兵事寔非所長若星條奏頗迂緩  
阿衡議論頗有氣概二十六日 特旨梁廷棟陞兵部尚書提  
督援兵吳阿衡着復原官軍前監紀巡閱御史方大任陞順天

巡撫大任老而且病然巡關時章奏皆有條理人亦冀其成功  
袁崇煥既逮御史高捷疏叅錢龍錫即指疏中與輔臣相商之  
語以為同謀先是文廟勅錢辨疏當痛言一番明主可為忠  
言而錢不能從也引罪疏甫奉旨不復再辭隨即入閣二十  
三日高捷再疏語更加厲得旨着致仕去至是而始悔不用  
前言則已晚矣

二十六之夜刑部獄囚盡逸幾為大患幸虜兵退盡城外無接  
引耳次日城門不啟為擒囚也逮刑部尚書喬允升左侍郎胡  
世賞下錦衣獄先是選警押至士夫有潛遣家眷南歸者右侍

卽朱世守以借轡與御史劉廷佐家眷出城劉止劉俸而朱降  
二級調用得免此禍

上初政盡徹諸內奄 兵關入乃 命太監李鳳翔提督京營時

總督襄城伯李守鐫協理侍郎李邦華邦華素持正不為下又以嚴汰老弱執法不少徇至是守鐫煽惑軍心幾成鼓譟邦華引罪曰籍以閹夢得代之或詢兩人優劣夢得曰鳳翔中涓耳尚可耐惟守鐫則真兇惡無比守鐫於逆賢建祠時與璽輝侯湯國祚各疏捐貲附祠共祝者也

山西巡撫耿如杞率兵五千入援皆効卒也至日兵部調守通

州次日調守昌平又次日調守良鄉功令初到之日不准開糧次日列營汛地乃准開糧西兵連調三日三日皆不得糧既飢且憤遂沿路劫掠虜兵既退如杞以不戢軍士逮問如杞既逮五千人哄然犇散潰歸山西而晉中流賊從此起矣

甘肅巡撫梅之煥統兵入援兵以糧不時給脫巾鼓譟之煥查倡首者數人正法有十餘人潰歸陝西後之煥亦以軍令不嚴革職為民

時虜兵所至望風奔潰惟三河三攻其城不克寶坻亦受攻堅守得全三河知縣樊士英陝西舉人寶坻知縣史應聘河南人

乙丑進士昌黎知縣左佩弦亦以卻敵功超陞山海兵備僉事  
後以冒破軍餉遣戍

時紅夷貢炮至涿州南騎充斥不能前進虜騎甫退馮銓躬率  
家丁護送入都冀以回 聖心為翻案計中外皆為之地矣

上傳旨馮銓准復冠帶不必陛見銓快而去舉朝歎頌

聖明真不可及云

三年庚午正月兵部尚書申用懋罷本兵與司禮文移往來向有  
定式 神廟末年諸事業胥舊式遂廢後來者亦不講究文移  
違式司禮拒不收則以厚賄備申公往往任重復舊式厚賄禁不

用大璫皆不悅又時上方銳意功業申公老成持重不能仰副聖意梁廷棟猥巧人也甚為上所倚任初五日內旨申用懋著解任回籍梁廷棟著回部管事

大學士韓爌罷爌忠厚拘謹不能當聖意左庶子丁進以陞轉愆期遂出彈章工部主事李逢申中書原抱竒繼之爌三疏請告得旨允放其禮頗厚進與逢申皆爌已未所取士也進後奉旨以陰陽閃燥降調逢申隨以監督火藥失事下獄遣戍

吏部從無以五品調者二年八月江南司官陸康援給假回鄉

共推較無錫華允誠華亭相公獨推較同邑王陞王與望未字  
而華一寒微肯退遜不前以此久無定局宜興入政府借江北  
司官解學夔降謫事遂票 旨着破格推堪用的來看乃起調  
戶部郎中吳鳴虞以文選郎中管員外事真破格矣吳年老  
矣無所短長踰年請告歸

虜騎既退 廷議昌平 陵寢所在通州國儲所寄應各設重  
臣鎮守於是推河南巡撫范景文太僕寺少卿侯恂俱以兵部  
右侍郎往恂督治昌平景文督治通州又遣兵部主事王建侯  
章應望各贊畫軍務



二月初十日 冊立 皇太子 上以戒嚴免陞殿百官聽宣  
敕于午門行十二拜禮 賜三品以上及 日講官各花朶紅一  
疋三品以下皆半紅花枝用角 日講官紅全疋花枝用銀儀  
制署司事員外賀世壽叙勞陞光祿寺少卿尚書李騰芳加太  
子少保

方大任既放復有身雖去國心不忘君一疏先臣特上疏糾之  
畧曰臣初見大任疏計必當以薊門要害將士情形與夫戰守  
防禦用兵治餉之策瀝將死之善言酬破格之隆遇乃纔：洋  
洋祇剝製朋黨之唾餘復理東林之塵案即今 皇上起用東

林諸臣其無才而不稱任使者則有之其懷奸而恣為欺罔者  
盜用朝權者未之有也近者諸臣之得罪或以封疆或以職守  
皇上未嘗有一毫成心一毫偏聽乃曰時：因事掃除夫 離照  
當空八柄在手當去則去之當罪則罪之何必借事為掃除之  
計哉此奸回術數奈何以誣 聖主也 皇言綸綍炳若日星  
惟真惟澹澹然與天下昭揭之亦何不可而必欲但與密勿銓  
衡三五大臣私相告誡成一家之私言此又曖昧行徑不當入  
告 明：之后矣况真澹二字大任亦僅言之已耳七品小官  
驟膺開府煌：節鉞不用以經武而用以畫錦澹乎不澹乎佯

死却担何其憊也發憤揮毫抑何壯也及獲如此真乎不真乎其所以獻媚于三五大臣恐大臣之公忠者亦未肯任受也大任試余影自盟斯亦不澹不真之極思矣疏入留中

三月。上命出刑部尚書喬允升左侍郎胡世賞于獄寓所聽勘先臣以去年四月入朝班秋講即題充日講官同事者侍郎李孫宸少詹事何吾騶庶子丁進姚希孟而羅喻義以待郎先臣以諭德則新題者徃例春講以二月上御講筵是歲以違事孔殷至三月初十日始開講先臣進講定公問君使臣章及獲規諷頗極剴切講畢上傳諭講官暫留久之殿門皆閉

諸講官退至東閣則 聖諭已宣付閣中釋允升世常於獄乃  
知 諭留講官俾知即見之行事也閣臣俱拱手誦啟沃之功  
先臣不敢當也以後進講大璫窺 聖意所注競前致殷勤焉  
先臣但一揖而已不交片語

一日 上御講筵足加于檼榜 上意有情容先臣遽進講尚書  
講至為人上者奈何不敬因以目視 御膝 上即以袍袖隱  
之徐：放下

經筵開講詞林諸臣無不畢至講官二人一講論語一講尚書  
上與講官各目一桌資淺者充展書等官春講秋講止舉行一二

次 天廚頗費弗克給也 日講則止用講官六人一講論語

一講中庸一講尚書一讀通鑑餘二人輪替 上與講官共一

桌真不啻 天籟咫尺矣講之日 上出御文華殿閣臣率講

官行五拜禮三叩頭禮畢內侍舉桌安放訖 上宣先生們來

講官始入講畢 上復宣先生們吃酒飯乃謝 恩而退若遇

齋祭之期則云茶飯春秋開講後日：進講除 上傳免外母

或廢者傳免皆於隔日薄暮傳 旨云明日暫停講讀一日雖

或連輟十日半月皆日：傳免但云暫停一日也遇立春端陽

中秋重陽冬至除夕日講官每入各內賜酒饌一盒大小五器

湯麵二器酒二餅 聖壽元旦各 內賜銀三十兩進講之夕  
光祿寺每人折供給銀一兩三錢傳免則否

吳江呂純如護送 惠王之國其後 命疏於護送太監劉興  
趙東葵等極掄揚褒美有云其愛地方也既一州一木之恐傷  
而其自愛也又一新一水之若浼仁聲遐布清節可師至歸美  
逆賢一則曰厥臣之選材良再則曰厥臣之率屬嚴云：此係  
天啟七年九月卽報抄傳四海共覩而 鼎湖之泣純如適以  
侍郎署中樞事密笑神通私行改換乘虜騎甫還之後擬借還  
才以翻逆案王永光等為之與主純如遂首先上疏訟寃謂護

送 惠藩後 命疏未嘗端美厥臣不當列于逆案之內且引  
聖諭湏有憑據不許借題之 旨又謂紅本在 御前別本在通  
政司抄案在禮科如有厥臣二字便甘附璫云云通政使章光  
岳即為封進時純如氣焰甚張言路俱暗先臣特出 講筵已  
輟疏糾之畧曰 帝王之學與經生學士不同必以經術經世  
乃為實用竊見虜騎內犯 聖心焦勞綜覈事功須挈綱領刑  
法雖峻猜疑漸啟于事未有濟也故于君使臣以禮章勸  
皇上培養士氣推心感人而辨賢奸酌用舍尤憐：焉見命將出  
師莫有定筭功罪未審賞罰未明今虜蹙遵永十有餘旬瞬息

長夏又將秋高彼時：可來我着：無脩禁如繫絲絕少成緒  
故于管仲器小章引管子言兵主不足畏則戰難勝也德必當  
其位功必當其祿信小人者失士也見群小合謀必欲借邊才  
以翻逆案故于子語魯太師樂章願 皇上剖晰是非辨別邪  
正而曰一音襍而衆音皆亂一小人進而衆君子皆廢今有平  
生無恥慘殺名賢之呂純如且藉輿援而思辨雪矣消長剝復  
之閒甚可畏也又見吏部尚書王永光身為六卿之長獨蒙  
皇上眷注而假竊威福擅行私臆故于甘誓章言戰勝攻取非獨  
左右之共命尤在六卿之得人而曰用舍不淆于倉卒則國



是定而王靈暢威福不假于信任則神氣振而敵愾惕大抵  
皆為用人之人發也又見永光機深計巧投無不中故以年例  
大典而變亂祖制考選公典而擯斥清才舉朝震畏莫敢訾  
故于五子之歌章言識精明則環而伺者無所售其欺心純一  
則巧于中者無所投其隙臣故知皇上聰明天縱必能洞燭  
其情猶為此語者則憂治危明之極思耳總之今日大小臣工  
當視國如家除虎雪恥不當分門別戶引類呼朋此臣一念  
孤忠九死不回者也奉旨文某講惺教陳寓規時事知道了  
所指呂純如慘殺名賢藉援球雪及年例變制考選擯士等語

遂着據寔奏明先臣再疏略曰臣所謂呂純如慘殺名賢蓋指  
故吏部員外郎周順昌也當純如為福建守道日以誦媚稅監  
高宋為事比高宋寔執閹撫激成民變純如與宋携手同步揚  
揚市廛萬口唾罵周順昌為福州推官剪除稅棍撫定人心純  
如忌之屢肆下石後純如投身逆璫躍取節鉞順昌訟言攻之  
語多過激純如遂挑怒巡撫毛一鷺侵時走入京師與諸用  
事者構成李寔之疏而順昌被逮且榜死獄中矣同時慘死諸  
臣所歸為徹骨之清及公忠亮直人：心服者以順昌為第一  
其致死之由全出于純如此天下所共知今當先上疏求雪不

但變天下之是非且搖 皇上之斧鉞則恃有吏部尚書王永  
光為之與援也夫逆案之定其主持全稟 宸斷而群小營  
窺闕以為旋轉 聖意易于反掌故首借邊才之說進而純如  
之疏即繼之呼吸通靈提掇如響不然通政司周侯古之寄也  
非大力者主之此何等事何等人而輒具匭以進哉至于臺省  
為公論所自出凡會推年例等大關係事則吏部不自主而必  
會同史料河南道若近日所推年例史料都給事中陳良訓誰  
為開送誰為商計哉不過以其稍持公道每多叅駁乃借外轉  
以除礙手耳至考選新資賢才輩出永光度無所施其籠絡乃

獨斥一才名素著物望咸歸之陳士奇以示有權而十年冷署之滿有功亦以猜疑見弃迨人情洶々衆議沸騰則姑為兩請而終擯之為大臣而心術如此斯亦不忠之尤者矣王永光疏辨前者閤部定案進呈時臣被言註籍已純如入案臣不及知何自援而出之至陳良訓濫厠首垣與叅廷議人言噴々夫豈無因至考選過堂十六人內選授科道十四人部屬二人而此二人者前途正遠因材儲用期待殊不薄也時永光已密結大璫王永祚為之道地謂士奇出姚庶子之門姚與先臣渭陽誼重考選時力為把持既考後漫肆成此疏于是聖意拂

然永先得 旨甚溫而先臣奏疏奉 旨講官懷忠啟沃循職  
自可敷陳文某不得任情率詆若夫逆案之堅持不動雖絲  
聖斷而此疏亦不無小補矣

虜兵雖東復破永平灤州盤踞不退永平鄉官白養粹首先迎  
降孫閣部督師東行奉撫諭祖大壽之 旨令馬世龍衝重圍  
而東馳三日夜追至蘆峪口說以利害激以忠義衆皆聳聽大  
壽始率遼兵三萬世龍亦招集趙率教部下及舊時部曲共萬  
六千人合隊而西世龍獨薄敵壘而前死傷者千餘人始抵都  
城後躡虜兵至薊門時洪橋大安等處虜兵擄漢人運所掠輜

聖世龍傾知之密以大砲先伏于路旁俟其過發砲衆皆驚走  
世龍追擊之殺獲百餘人遂以大捷聞祖大壽雖統兵三萬立  
木柵于山海西關不敢前進入援總兵尤世祿吳自勉楊麒宋  
偉王承恩等各率所部聯營于滦州之西相顧莫敢先發世龍  
既連奏洪橋大安之捷乃貽書大壽曰遼兵每謂西南兵將怯  
弱不若遼兵強健今怯弱者皆奮不顧身建兩地之捷而強健  
者何在況各鎮勤兵已漸鱗集若不合謀共力退南兵復故城遼  
之強健將士何賴復支 朝廷厚餉乎大壽見書始移營而西  
孫閣部乃嚴檄諸將期共攻滦永申明軍令有舊永平兵備張

春者素得民心曾練有鄉勇二萬皆精銳可當一面逆璫時張  
春被劾罷歸鄉勇皆散及是上復起張春為永平兵備永民  
聞之皆不遠百里來迎向所練鄉勇皆未會軍聲大振四川副  
使劉可訓甫破水西酋率勝兵入援本兵梁廷棟又使其所善  
司務丘永嘉監紀軍事奉旨趣師期者再高陽遂以五月四  
日誓師六日詣撫寧八日大壽先趨涿州世龍令副將謝尚政  
等攻遵化而身馳至涿與大壽分地夾攻大壽麾兵人所一抑  
頃刻平其濠世龍與張春劉可訓等皆披堅執銳作諸軍前鋒  
身冒矢石誓不返顧急以大砲仰擊虜兵稍却師從間以登十

三日克滦州 兵冒雨突出而南騎自永平趨救者知滦已破遂并遷安兵于永平屠其衆從冷口出所存者十之四五而已師既復永平而謝尚政等亦以十六日克遵化生擒猱、木等二十二人及我叛人馬思恭賁維鏞呂及第等十一人獻俘

闕下先是滦之叛將遣一老道士詣木嘉請獻城高陽授計大壽姑應之而嚴其後勁以備不虞及我師抵滦莫有應者最後中北伏兵幾盡人咸服高陽先見云大兵之入城也叛人白養粹已死其母尚在張春先至盡封所有而出絕無染指世龍至則盡取其所有大壽至空無所得遂將白母用極刑乃盡出窖



藏蓋幾百萬云永平糧儲陳此心卿紳郭鞏俱以屈節被遣  
後刑部擬此心等以謀反律大理寺卿金世俊力爭之乃擬監  
候處決

當溧永之未復也高陽興東江牽制之議令茅元儀統龍武三  
協兵以往中協兵詳斥元儀而以周文郁為中協副總兵兼攝  
左右兩協甫行而剿興治之變作興治者興祚之弟興祚即劉  
爰塔也興祚沒于陣興治居皮島東江副總兵陳繼盛謀報興  
祚未死其弟興賢自北營以書招興治興治富有夷丁旦夕當  
有變興治大恨偽為其兄設醢誘殺繼盛等二十餘人揚帆至

小平島適漂永克復之信至乃復遶攻島高陽遣文郁以興祚  
舊恩招之文郁入興治營始以溫言喻之繼以危言怵之興治  
心動時部將逃匿變島者與東師相聞而聞興治怒令島衆統  
舟號訴文郁呼其將語之曰陳繼盛流言島衆謀叛今若殺我  
是寔其言也島衆不足惜劉氏從此無噍類矣興治大悔悟明  
日飲餞文郁搏顙大笑而別九月興治敗南兵于青山鳳凰城  
高陽奏捷并上文郁首功當國者患其無所歸絀其功不叙高  
陽又請移興治于旅順責以恢復金復部議逡巡不果踰年興  
治為島衆所殺

薊鎮總兵朱國棟自縊以舊總兵張世顯署鎮事與總督劉策  
率兵堵禦俱以逗留不前被逮至是俱伏法先是河南巡撫缺  
陞太僕卿張潑往潑既領 敕矣復上乞休一疏閣中票

旨遽准其請山左諸公大譁以為推折東人太甚也遂薊遼總督  
喻安性罷歸共推轂劉策不半年遂罹此禍

溧永既侵廷議添設山永巡撫適方大任以病乞休王廷試梅  
之煥相繼罷斥乃陞四川副使劉可訓巡撫順天兵部司務丘  
嘉禾巡撫山永前屯兵備孫元化巡撫登萊漢中兵備劉應遇  
巡撫甘肅皆孝廉也張春加太僕寺少卿候巡撫缺推用

按立未嘉以九品務郎躋躋節餞尤屬異數非中樞梁廷棟之力不至此似當以張春撫山永未嘉陞永平道為安

先臣既以疏言不當 聖意且永光輩側目甚切欲乞南京掌院以歸時大名為李達申所劾在告宜興許為題轉矣大名開籍出以為此劣轉不使乃題 封差以行是秋賁 節 冊封進賢王及益府世子妃

烏程之叅虞山也宜興實佐之宜興既爰立所以為烏程地者甚力吳宗達宜興姻也於是時揭二人奏請 上亦以烏程孤忠可任六月十一日 特旨溫体仁吳宗達俱著以原官兼東

閣大學士同首輔成基命入閣辦事

袁崇煥在 詔獄尚未定罪至是獄具八月十七日 旨下袁

崇煥着即會官處決錢龍錫着革了職法司議罪隨即逮問其  
南達也人皆以高忠憲期之迨其至則辱國甚矣且牽扯同事  
兩輔吹之不置又有道之傾陷蒲州以快其願之怨者然

聖意已定蓋其奏對語入於 天聰不可援人以自解也然不如

此株連起大獄則又共仰 聖主離明之照已陸澄源疏奏御

史毛羽健為崇煥黨亦革職下獄

崇煥既決群小合計欲借此以起大獄翻逆案御史田唯嘉疏

薦楊維垣賈繼春通政使章光岳疏薦呂純如霍維華徐揚先  
傅概虞廷陞葉天陞六人有 旨逆案奉旨方新居然薦用成  
何政体而後群小阻喪始不敢妄矣云

時 上以封疆多故群臣蒙比為奸削謫逮繫毫不少貸河南  
府推官湯開遠上疏畧曰 皇上急于求治諸臣救過不給臨  
御以來明罰救法自小臣以至大臣與衆推舉或自簡拔無論  
為故為誤俱褫奪配戍不少貸甚者下獄考訊幾于亂國用重  
典矣 皇上或以薦舉不當疑其黨徇四岳不薦繇乎績用弗  
成本嘗併四岳誅之也 皇上又以執奏不移疑其藐抗漢文

不從廷尉之請乎亦以張釋之曰法如是止耳不聞責其逆命也 皇上以策勵望諸臣於是多戴罪夫不開以立功之路而僅戴罪戴罪無已時矣 皇上以詳慎望諸臣于是有認罪夫不漸其認罪之心而槩云免究認罪亦成故套矣侵糧欺餉之墨吏逮之宜也恐夷齊之侶不皆韓范宜稍寬之不以清吏詘能臣今諸臣怵于叅罰之嚴一切加派帶徵餘徵行無民矣民窮則易與為亂 皇上寬一分在臣子即寬一分在民生而尤望皇上官府之際推諸臣以心進退之間與諸臣以禮錦衣禁獄非係寇賊奸宄不可入如是而大小臣工不圖報為安樣者未之

有也時左副都御史易應昌御史李長春皆以言事下獄長春  
幾至西市間臣力救得免故開遠疏反之

先文肅雖奉 使出都而群奸修怨未已呂純如辨疏甫至而  
錦衣張道濬隨疏叅初其氣甚惡奉有不忍苛求之 旨

聖主明照固自萬里後先臣亦有疏辨畧曰微臣立身粗有本末  
仕版初登即觸權奸之烈焰謫居五載復撻羅織之光鋒朝端  
公論難誣海內清評具在夫昏夜黃緣望塵羅拜正孤媚蠅營  
之故態蓋純如嘗謂生祠之建不妨委蛇媚璫惡名所不必諱  
種：無將之言昭著耳目有必不能抵賴者臣尚不欲盡揭之



奈何反以相誣臣亦不屑與較至于鹵騎臨城之日正臣闔門  
自誓之時臣子應試南都去在城守解嚴之後迨乎奉使辭  
都顧驟覓輜輶屬累：談門可查若曰君父恩輕妻孥念重  
此又小人肝胆中事臣死不為也夫臣所深恨者逆璫之私客  
而必坐之曰背公臣所心憐者慘死之忠魂而必坐之曰死黨  
推其意仍欲窮鈎黨之流殃刈貞臣如草菅而後快于心恐  
光天霽朗宿霧澄清似不必續曉殘之夢虛報溺之灰矣至若張  
道濟未諳文義謬析臣疏代人報復彼固欲陷臣以危法而  
皇上已洞悉其隱情夫獊噬固能傷人而豺豕亦當自斃臣尚不

肩與純如辨何肩與道濟辨第臣雖不才儻負講慳純如何  
人哆口雌黃微臣何足惜其輕朝廷而羞當世之士亦已甚  
矣豈可復覲頴清班以負皇上之禮遇哉奉旨奏內事情  
公諭自明文某依限前來供職不必陳請

去冬甘肅援兵鼓譟潰兵十餘逃回陝西二月壬子順苗美勾  
連逃兵掠米脂清澗綏德遂南圍韓城總督楊鶴巡撫劉廣生  
提兵撲勦斬首十餘級賊北走侵犯清澗官兵追逐之降三百  
餘人苗美叔苗登霧嘯聚于安定總兵杜文煥擊敗之四月王  
子順苗美自神木渡河陷蒲縣適山西逃兵亦至遂與合其勢

頗熾子順自號橫天一字王苗美自號混天王王承胤亦攻陷  
府谷渡河入山西犯吉州太平等處五月王子順等復歸陝西  
掠同官破金鏐閬殺叅將王康六月王嘉胤亦還陝西陷黃甫  
川清水二營遂據府谷延綏巡撫洪承疇檄兵杜文煥擊敗之  
延安知府張輦叅將艾穆慶賊于延川賊求撫王子順張述聖  
姚三兒皆降王嘉胤等分掠延慶等處多陷總督楊鶴主撫臣  
不以聞賊首黃虎一大青小紅狼混江龍掠地虎等俱謀免死  
安揀河西地方民罹毒益甚有司莫敢告八月王嘉胤勾套虜  
入犯洪承疇杜文煥從孤山進擊大破之十月嘉胤復陷清水

營殺游擊李顯宗寧夏總兵賀虎臣擊賊于盤谷斬首六百餘  
級又敗之寧州十一月山西總兵王國標擊賊于河曲發炮  
炸衆亂賊衆之大潰遂陷河曲十二月神一元作亂破寧塞殺  
叅將陳三槐遂圍靖邊時又有高迎祥聚衆稱亂自號闖王米  
脂人李自成入其黨稱曰闖將